

1615


35^o part in 12.

241

LE
STESICHORE
CHRESTIEN
A LA
SOCIETE
DE IESVS.

RESTAT IGITUR
VT
PALINODIAM SCRIBAS,
ET
RECANTATIS OPPROBRIIS,
VESTEM
DOMINI TVI,
QVAM
PVBLICE SCINDEBAS
PVBLICE RESARCIAS:
QVATENVS
SICVT MVLTI
EXEMPLVM ERRORIS
FVISTI,
SIC
DE CÆTERO
FIAS
EXEMPLVM CORRECTIONIS.

Yuo Carn. Ep. 7.



LE

STESICHORE CHRESTIEN

A LA SOCIETE' DE IESVS.

SO C I E T E', qui portes le nom du Saint des Saints, duquel le Ciel, la terre & le profond des abysses, par vn acte d'Adoration souveraine recognoist les ineffables grandeurs; Je ne sçay, si voyât cet Escrit, & le tiltre de ce Discours, tu en receuras, ou plus de contentement, ou plus d'estonnement. Car au milieu des afflictions, qui t'assailent, ce semble, de tous costez, lors que tes Ennemis font tous leurs efforts pour te ruiner, voir quelqu'un qui prenne ta defence (quoy qu'elle ne depende, & que tu ne l'attendes que du Ciel) quel cõtentement? Au milieu des bruits communs, des murmures, des mesdisances, & des calomnies; lors mesme qu'il est plus dangereux de se taire, que de parler contre toy, voir ceux qui t'ont autrefois cruellement offencée, prendre maintenant leurs mesmes armes, & te les rendre aussi fauorables que celles d'Achille à Telephe; quel estonnement?

Que si dans cette rencontre (comme tu sçais iuger de toutes choses) tu peux recognoistre l'esprit qui me porte à ce dessein, tu iugeras, ie m'asseure, qu'il vient du Ciel, & luy donneras autant de loüange, qu'il recevra de blasme parmy ceux qui font gloire & profession de te nuire, & n'ont point d'autre esprit, que celuy du Monde, leque

242 4
i'aduouie m'auoir autrefois animé contre toy, lors
que d'un style trop outrageux ie te fis presenter
le Cartel, & prendre les armes contre les Vniuer-
sitez de France, lesquelles & principalement cel-
le de Paris, glorieuses de t'auoir surmontée sem-
bloient conuier tous ceux, qui ont quelque part
aux Lettres, de dōner des Louanges à leur coura-
ge, des Palmes à leur victoire, & des acclama-
tions de ioye à leur triomphe.

De verité, ie confesse, que n'ayant iusques alors
excedé les termes des simples discours, & la le-
cture des libelles & des escrits, qui t'offensoient,
selon la rencontre des temps, des lieux & des per-
sonnes, la voix publique, le sentiment de ceux
qu'on estime bons François, le bruit commun,
l'entretien pour lors des compagnies, & les pro-
clamations de l'Arrest du Priué Conseil du 27.
Auril 1624, ie ne scay à quel dessein, & par quel
mouuement, me porterent insensiblement, dans
le vice du temps, qui est la liberté d'escrire: le-
quel, pour estre vn des plus dāgereux en vn Estat,
ne fut iamais plus frequent, & iamais moins pu-
ny: & sur tout parmy nous, qui sous la bonté de
nos Roys, posons volontiers pour fondement de
ceste liberté ceste maxime del'Empereur Tybe-
re; *Qu'en vn Estat libre les langues doiuent estre libres.*
En quoy ie puis dire avec verité, & ne doute
point, que cet escrit, ne te le fasse cognoistre, que
ce n'est pas tant vn dessein premedité, que i'aye
eu de t'offencer, qu'un vain desir de tenter le
bruit de la Renommée, & le iugement des esprits
curieux à la mode, qui n'ayants point d'autre, ou
point de meilleur entretien, le cherchent dans la

nouueauté des liurets & des pieces, que ces Paperotiers & Vendeurs de cayers en cachette leur tirent par dessoubs le manteau à chasque bout de ruë; qui m'a fait entreprendre vn trauail si leger & inutile.

Ne pence pas pourtant, que ie vueille chercher des excuses dans les considerations du temps, & me iustifier sur la corruption du siecle; qui à grãd peine laisse aux bons Esprits la liberté de bien dire, & aux plus sçauants de bien escrire: veu mesme que la vanité & la curiosité est paruenue iusques à ce point de folie & meschanceté, qu'on ne met presque plus au nombre des beaux Esprits, que ceux qui n'en ont point, ou ne le font paroistre qu'en des pointes tres-pernicieuses, dont ils arment la pointe de leur langue, ou de leur plume, pour n'en tirer que des marques d'impiété, & des traiçts de mesdisance & de calomnie, contre ceux là mesme, dont le sçauoir eminent, l'excellente vertu, & la vie irréprochable ne deuroit rien moins craindre & sentir, que les piquantes morsures de l'Enuie & de la mesdisance, les deux mortelles ennemies de la Vertu & de la Saincteté. Lamies infames, qui sous l'apparence d'un grãd sçauoir courent vn monstre d'ignorance. Harpies abominables, qui sur les ailles de leur presumptueuse & damnable curiosité, se portent dās les plus saintes & celebres Compagnies, & les infectent des puantes humeurs de leur venin.

Loing, loing de moy desormais ces monstres conceus dans l'Enfer, qui ont fait ce rauage dans mon ame, & m'ont soufflé dans l'Esprit vn esprit si damnable & peruers. Loing de moy cet Esprit,

qui ne se plaist qu'aux mesdisances, & ne se paist que de detractions. Loing de moy ce Demon, qui trouble nostre imagination, peruertit nos sentimens, & fait oublier à nostre iugement les loix de la raison, pour n'en suiure point d'autres que celles de la passion, qui n'a le plus souuant pour fondement, qu'un leger interest, & pour reigle, qu'une opinion vainement conceuë de ceux dont les actions nous sont tant soit peu suspectes. Telles, qu'ont esté les tiennes, sainte Compagnie, dès lors de ton institution, & establisement en ce Royaume, dans l'esprit de ceux, qui pour paroistre bons François & bons Politiques, se sont imaginez que ta faueur aupres de sa Sainteté estoit suspecte aux puissances temporelles: que tes intentions estoient Espagnolles, que tes affectations n'estoient point pour la France, en un mot, que ta grandeur estoit redoutable & preiudiciable à l'Estat. Comme si on ne pouuoit se rendre necessaire aupres du Pape, defendre la Chere de saint Pierre, & l'autorité de l'Eglise, sans offenser la Majesté des Roys, ses sacrez & plus chers enfants, & principalement des nostres Tres-Chrestiens.

Mais d'autant que ie pourrois sembler à plusieurs, dresser icy vne Apologie, pour vn Becanus, Mariana, Scribanus, Sanctarellus, & autres, dont les Escrits ont remué la pierre de touche des vrais François, & reuoker en doute la Censure de la Faculté, & les Arrests du Parlement de Paris, ie me contenteray seulement de renfermer ce Discours dans les termes de son sujet, & te dire franchement, que si lors que nos Vniuersitez se banderent, & obtindrent gain de cause contre

Toy, dans le commun resentment & applaudissement de leur ioye,

— *Me quoque pectoris*

Tentaui in dulci iuuenta

Fervor, & in celere Iambos

Misit furentem; Nunc ego mitibus

Mutare quero tristia: dum mihi

Fi as recantis amica

Opprobrijs, animûmque reddas.

Et pour commencer par le General, à quel propos t'appeller *Dueilliste*; Toy qui n'abhorres rien tant parmy nous, que ceste Rage plus que brutale & detestable Felonnie (ainsi que l'appelle vn des Tiens) qui fait si souuent plaindre la France, & pleurer de larmes de sang la perte deplorable de sa genereuse Noblesse? Quel sujet, de te nommer Amazonne à deux mammelles; Toy, qui fais couler de ton sein comme deux ruisseaux de lait, la Doctrine & la Pieté, les veritables alimens des Ames & des Esprits? Quelle apparence, de te dire Guerriere & Amoureuse des combats (*Præliatricem*) Toy, qui n'aymes que la Paix, & ne fais la guerre qu'au Vice, à l'Ignorance, & à l'Herésie? Quelle raison, de te surnommer Nouice temeraire; Toy, qui depuis vn si long temps as fait voir malgré l'Enuie & la Calomnie les vœux inuiolables de ta Profession, & les effets admirables d'une sainte Religion? Quel argument assez fort, pour monstrier, que tu es vne Societé trop associante, vne Societé deuorante, vne Societé Leonine; Toy, qui as combattu & terrassé le Lion rugissant d'Enfer, dont la gueule n'attendoit plus qu'à nous deuorer.

Il faudroit vn Esprit mieux fait, vn courage plus fort, vn style plus hardy, vn iugement plus solide que le mien, pour respondre à tous ceux qui ont escrit contre Toy, & t'ont accusée d'Auarice, d'ambition, d'infidelité contre l'Estat, & de trahison cōtre la personne sacrée de nos Roys: Aussi ne le veux-je pas entreprendre. Ce pourquoy il me suffira seulement de dire, que si c'est auarice de receuoir les bien-faits & aumosnes des Gents de bien; les dons & les faueurs des Princes; de prendre les Benefices, qui te sont accordez par la pure bonté & liberalité des Papes & des Roys, pour subuenir à tes necessitez, & entretenir vn si grand nombre de bons Religieux, tant de Predicateurs & grands Personnages, qui combattent pour la Foy, & pour la gloire des Lettres: si c'est Ambition de t'acquérir & conseruer la faueur des Papes, manier la conscience de nos Roys, te maintenir dans la Cour des grands Princes, & dans les Estats les plus florissans, captiuer la Bien-veillance des Peuples, prescher la parolle de Dieu, instruire le Peuple, enseigner la Jeunesse, eriger des Seminaires, bastir des Eglises, establir des Colleges par toutes les bonnes Villes, enuoyer des Apostres aux Nations Barbares & Infidelles: pourquoy n'accusera-on pas de ces mesmes vices les SS. Augustins, les SS. Dominiques, les SS. Benoists, les SS. Bernards, les SS. François, ou pour le moins leurs Ordres & leurs Successeurs, qui ont esté & sont encor plus riches, & plus puissans, que tu n'es, & ne scaurois iamais estre? Car ie demenderois volontiers à ces Encherisseurs de tes richesses, à ces En-

vieux

uieux de ta puissance. Ou sont les Eueschez que tu as iamais eu? osté l'Abbaye de la Couronne, & quelques petits Prieurez, ou sont les grands Benefices que tu possedes? puis que tu ne peux mesme obtenir les plus petites Prebendes & Chanoines, tesmoin l'Arrest du grand Conseil pour le College d'Angoulesme. Ou sont les belles Terres, les Maisons, les Seigneuries que tu acquiers? Ou sont les Constitutions de rente que tu fais? Ou sont les Testamens, les Legs, les Donations que tu pratiques, puis qu'on te dispute les plus pies & les plus legitimes? Ou sont les charges que tu brigues? Les honneurs que tu poursuis? Ou sont les Dignitez que tu recherches? En vn mot, ou est ceste grande cheuance, & ceste puissance qui les fait murmurer contre toy? Ils me diront peut-estre, que tu ne veux pas recognoistre les Euesques, & leur as disputé la preface aupres du Roy. Mais si tes Predications & tes actions monstrent le contraire, qu'ont ils à repliquer, & à se plaindre de ta Modestie & de ta Pieté? Ils diront encor, que tes bastimens sont trop superbes, que tu taches de t'establir dans les bonnes villes, & t'estendre par tout. Et quel mal y a il en cela? Quoy, on veut mettre des bornes à la Pieté, à la Saincteté, à la Religion, qui n'en doiuent point auoir d'autres que celles de la parole de Dieu? Si c'est vn crime de bastir des maisons d'oraison, où les louanges & les actions de graces sont chantées, où le Sacrifice de nostre Salut est tous les iours celebré, & présenté à la diuine Majesté, avec tant de zele & de deuotion: pourquoy blasmeront ils les Perles qui ruinoient & auoient

en horreur les Temples ? Et pourquoy s'attaqueront ils plustost à Toy, qu'aux autres Compagnies, qui font le mesme, voire te surpassent en plusieurs lieux, ou en richesse, ou en nombre, ou en magnificence de bastiments. Et partant il est vray de dire, que ces calomnies, & ces vers,

Quisquis obit, &c. qui ont esté publiés, & dits contre Toy, n'ont besoing d'autre responce, ny d'autre Esponge pour espreindre, ou esteindre leur venin, que de celle qui se peut tirer de l'impieté & infamie de leur Autheur, marquée de ses viues couleurs en ces vers,

*Namque illa, quæ vinosus & spurcus Nepos
Meretricis inter stertuit nuper sinum,
Vidui locelli, calibesque capsula,
Araneânsque bursa mentiri docenti;
Tabulaque clamant publica, & iurant palam,
BATTAVVS ILLE Calumniator pessimus,
BATTAVVS ILLE pessima dignus rota est.*

Pareille responce pourrois-je faire à l'Epigramme faite sur le Tableau de tes deux Patriarches les Bien-heureux Peres S. Ignace & Sainct François Xavier, qui ont à leurs pieds vn globe Celeste, & la face leuée vers le Ciel, si ie ne sçauois que son Autheur est aussi esloigné de l'Herésie, que celuy-là l'est de la vraye Foy : & qu'il n'a iamais eu l'ame si noire, qu'il ait voulu tourner à mespris l'honneur que l'on doit à ces deux grands Saincts : & que ç'a esté plustost vne faillie d'Esprit, quoy que mal employée, qu'une mauuaise volonté, qui l'a fait naistre; comme c'est l'ordinaire, dans la rencontre de l'objet & du temps. Ce pourquoy i'ay penceé que ce seroit assez de

rendre celle cy à leur Honneur, & à la louange de leurs Successeurs.

Stat globus ante pedes, spectat sed vultus Olympum:

Vos Divûm, O Socy, cernitis ora Patrum:

Iure igitur cœlum, non Orbem quaeritis; Et quâ

Monstraverè Patres, tenditis ire via.

Quant à ces Maximes d'Estat, qu'ils fondent sur les mysteres plus secrets de ta Religion, & qui ne sont communiquez. qu'à ceux de la plus secrette & parfaite Profession, ie ne sçay quel Esprit (si ce n'est celuy de diuision) les a forgez dans leur imagination, pour en tirer des consequences si esloignées de toute apparence, & si contraires au sens & à la raison. Certes, on peut bien se garder du crime, mais non pas du soupçon. L'innocence peut bien nous defendre du iugement de Dieu, mais non pas tousiours de celuy des hommes: Elle peut bien nous sauuer du remors, qui est le Tyran & le Bourreau de la conscience, mais non pas nous preseruer de la calomnie, puisque l'innocence mesme du Sauueur du Monde n'a peu éuiter la rage & le venin de ce Monstre, que l'Enfer a produit pour la ruine des Hommes. Et quoy? s'il estoit vray, que ces attentats abominables commis contre la sacrée Majesté & personne de nos Roys eussent seulement passé par tes Conseils (n'y ayant que les Demons qui en pussent estre les Autheurs) le Ciel seroit-il pas iniuste, s'il n'en descouuroit la verité, pour ne t'en laisser impunie. Mais tant s'en faut que c'est luy, qui tesmoing de ta fidelité, & de tes saintes affections, a tousiours pris ta defence.

Pourquoy donc blasmerons nous HENRY LE

GRAND de t'auoir restably, & osté les marque del'infamie qu'on croyoit ne deuoir iamais estre effacée de dessus ton front? Il sçauoit bien, ce sage Monarque, combien tu luy estois importante & necessaire, & recognut en fin ta Pieté de tant de faueurs & de bien-faits, qu'apres cela il n'y auoit plus lieu de douter de la sincerité de tes intentions, sainctement obligée, & à l'Estat, & à vn Roy si plein d'affection & de zele en ton endroit. Aussi quand son fils LOYS LE IUSTE te remit dans l'exercice des Lettres dans Paris, & te releua plus haut que tu n'auois iamais esté, que fit-il autre chose sinon acheuer l'ouurage encommencé par son Pere, & donner le dernier tesmoignage de l'asseurance qu'il auoit de ta fidelité.

Pourquoy appellerons nous Sirenes, ceux à qui les Roys ont confié leur conscience? Pourquoy Harpies, ceux qu'ils ont establis dans leurs Cours & leurs Louures, pour en arracher le vice & la corruption? Pourquoy des Prothées; ceux qui gardent tousiours vn mesme courage, & portent tousiours vn mesme visage, soit qu'ils combattent pour la foy, soit pour leur conseruation, soit pour leur reputation? Pourquoy Crocodiles, ceux qui participent autant de nos mal-heurs, que de nos felicitez; & qui dans l'Eglise & dans l'Estat, dans le siecle & dans la Religion, n'ont point d'autre objet que la gloire de Dieu, & pour but, que l'honneur de son diuin seruice? Pourquoy Tritons au port d'Athenes, ceux qui ne sont portez d'autre vent, que de celuy qui inspire sainctement les ames, & les tourne vers le lieu de leur origine, & au port de la Beatitude?

A cecy on me dira , peut estre , ce qu'on a dit & escrit , que tu ne sçauois estre sans crime , puis que le Pere Arnoux fut chassé d'aupres de sa Majesté , pour auoir donné des aduis à l'Estranger , pour se mesler trop des affaires d'Estat , & qu'il s'en estoit allé à Rome pour en instruire sa Sainteté , & son General : mais cela se destruit assez de soy-mesme , dautant que les Ministres de l'Estat eussent grandement failly de ne le point arrester , de n'en faire point de perquisition , & le trouuant conuaincu , n'en prendre point la punition qu'eut peu meriter son crime : Et du depuis estant de retour à Lyon , ils n'eussent iamais permis qu'il eut monté en chaire , non pas mesme souffert , qu'il se monstrat en France , si tant est qu'il eut esté coupable & criminel de leze Majesté ; tu as trop d'Ennemis , & luy trop d'Enuieux pour le laisser impuny.

De dire que le Pere Seguiran , ait trop entrepris , & qu'il ait voulu faire vn Surintendant des Finances à sa poste pendant la Chambre de Iustice , qu'il a dissimulé la verité au Roy , & ne l'a point aduertie de la necessité de son Peuple , qu'il a contrequarré Messieurs les Euesques , qu'il s'est eschauffé le sang , & qu'il s'est enroué à prier & à solliciter au procès pour le College de Tournon , contre les Vniuersitez , iusques là , que sa voix en est comme deuenüe de Corbeau ou de Cornelle , nous a esté de mauuais augure , & nous a escorché par les oreilles : C'est estre ignorant des les affaires , & n'en parler , comme on dit , que par ouïr dire , ou comme vn auengle des couleurs : C'est parler avec plus de passion , que de verité d'un

742

personnage que sa vie & son sçauoir ont rendu si recommandable ; à qui la voix & le iugement des plus Sçauans ont donné tant de loüange ; que la bouche mesme du Roy en luy commandant de se retirer à iugé irreprochable. Si sa voix n'est si douce & si charmante qu'estoit celle du Pere Cotton : s'il n'a tant de parolles & de discours que le Pere Arnoux, sa doctrine le releue par dessus tout cela. Et certes il faudroit estre Hibou pour ne point voir, ou comme on dit, plus stupide qu'un Philonides, pour ne point admirer un Esprit rempli de tant de science, & d'une si haute cognoissance ; qui tient un des premiers rangs parmy les Tiens, & qui s'est acquis la gloire d'un des plus grands & plus celebres Predicateurs qui soient sortis de chez Toy.

Je n'oserois m'estendre plus auant, crainte de sortir du sujet de mon discours, & me deuouer pour victime à l'Enuie & à la Meuidisance de tes Aduersaires, qui sans doute blasmeront cest Escrit, comme contraire à leur sentiment, & à celuy que j'ay eu autrefois. Il me semble desja les voir secouer la teste, leuer le sourcil, tourner les yeux à trauers, rider le front, tordre le nez, tirer la langue, espanouir la ratte, & apres s'estre battus le flanc de trop rire, espandre tout à coup leur bile sur ce discours, prests à deschirer, s'ils pouuoient, son Autheur. Mais qu'ils grondent tant qu'ils voudront, qu'ils l'interpretent comme bon leur semblera, qu'ils en iugent selon leur passion, que leur iugement donne l'Arrest de sa condamnation ; Je seray content en moy-mesme, si tu en es contente & satisfaite ; Et, quoy qu'ils fassent,

pour toute conclusion ie diray & chanteray tous-
jours avec Toy,

*Mesdise quiconque voudra,
Mon IESVS sera ma defence,
Et tousiours le Ciel se rendra
Protecteur de mon Innocence.*

HÆC SATISFACTIO
SI PLACVERIT
VETRÆ PATERNITATI,
PLACET
ET
MEÆ PARVITATI.
HANC,
SI PLACET,
ACCIPITE;
SI PLVS PLACET,
PLVS ADDITE.

Yuo Carn. Ep. 67.

THESE THINGS BEING DONE
THEY WERE BURIED IN THE
TOMB OF THE VIRGIN

AND THE BODY OF THE
LORD WAS FOUND
IN THE TOMB OF THE
VIRGIN

THESE THINGS BEING DONE
THEY WERE BURIED IN THE
TOMB OF THE VIRGIN
AND THE BODY OF THE
LORD WAS FOUND
IN THE TOMB OF THE
VIRGIN

THESE THINGS BEING DONE
THEY WERE BURIED IN THE
TOMB OF THE VIRGIN
AND THE BODY OF THE
LORD WAS FOUND
IN THE TOMB OF THE
VIRGIN

THESE THINGS BEING DONE
THEY WERE BURIED IN THE
TOMB OF THE VIRGIN
AND THE BODY OF THE
LORD WAS FOUND
IN THE TOMB OF THE
VIRGIN

